

ষষ্ঠ অধ্যায় ২০১৪ সালের বিনা প্রতিদ্বন্দ্বিতার নির্বাচন

গণপ্রতিনিধিত্ব আদেশের ১৯(১) অনুচ্ছেদ অনুযায়ী বাংলাদেশের নির্বাচনি ব্যবস্থায় অর্থাৎ First-Past-The-Post system এ একটি আসনে কেবল একজন ব্যক্তি বৈধভাবে মনোনীত প্রার্থী হিসেবে অবশিষ্ট থাকলে অথবা প্রার্থিতা প্রত্যাহারের পর কেবল একজন প্রার্থী অবশিষ্ট থাকলে রিটার্নিং অফিসার গণবিজ্ঞপ্তি দ্বারা, উক্ত প্রার্থীকে উক্ত আসনে নির্বাচিত হয়েছেন বলে ঘোষণা করতে পারেন।

২০১৪ সালের দশম জাতীয় সংসদ নির্বাচনে ১৫৩ জন ব্যক্তি বিনা প্রতিদ্বন্দ্বিতায় নির্বাচিত হয়েছিলেন^১। দেশে-বিদেশে ‘বিনা প্রতিদ্বন্দ্বিতার’ এ নির্বাচন নিয়ে ব্যাপক আলোচনা-সমালোচনা হয়। Harvard University and University of Sydney এর যৌথ কর্মসূচি Electoral Integrity Project কর্তৃক প্রণীত পরিচালিত Perceptions of Electoral Integrity (PEI) সূচক বিনা প্রতিদ্বন্দ্বিতা এবং সহিংসতার কারণে এ নির্বাচনকে ‘failed election’ বলে অভিহিত করে^২। নির্বাচনের অব্যাহিত পূর্বে ২০১৩ সালের ডিসেম্বর মাসে প্রার্থিতা যাচাই-বাছাইয়ের সময় একজন প্রার্থী বিনা প্রতিদ্বন্দ্বিতায় নির্বাচনের বিধানটি চ্যালেঞ্জ করে আদালতে একটি রিট পিটিশন দায়ের করলে মহামান্য আদালত ১৮ জানুয়ারি ২০১৪ তারিখে বিনা প্রতিদ্বন্দ্বিতায় নির্বাচিত ১৫৩ জন সংসদ সদস্যের বৈধতা নিয়ে প্রশ্ন তোলার কোনও সুযোগ নেই বলে ঘোষণা করেন^৩।

নির্বাচন অনুষ্ঠানের পূর্ব থেকেই সরকার ও নির্বাচন কমিশন সব দলের অংশগ্রহণে নির্বাচন অনুষ্ঠানের পথ থেকে সরে আসে। এর অংশ হিসেবে সরকার সংবিধান হতে নির্বাচনকালীন তত্ত্বাবধায়ক সরকার ব্যবস্থা একতরফাভাবে বাতিল করে। যার ফলে অবোধ, সুষ্ঠু ও নিরপেক্ষ নির্বাচনের স্বার্থে নির্দলীয়, নিরপেক্ষ তত্ত্বাবধায়ক সরকারের অধীনে নির্বাচন অনুষ্ঠানের দাবিতে প্রধান বিরোধী দল বিএনপিসহ অধিকাংশ রাজনৈতিক দল আন্দোলন করে। সরকারের কর্মকাণ্ডের কারণে রাজনৈতিক অংশে বিভক্তি শুরু হয়। উক্ত সময়ে সকল রাজনৈতিক দলকে আস্থায় আনার চেষ্টা করা নির্বাচন কমিশনেরও দায়িত্ব ছিল। এর জন্য প্রয়োজন ছিল নিবন্ধিত রাজনৈতিক দল ও অংশীজনদের সাথে সংলাপ করা। নির্বাচন কমিশন কারো সাথে কোন সংলাপ না করে জাতির সংকটের সময়ে সরকারের সাথে আতঁত করে সংলাপের কোন উদ্যোগ গ্রহণ না করে একতরফাভাবে নির্বাচনের তপশিল ঘোষণা করে। সরকার বা নির্বাচন কমিশন কেউ সুষ্ঠু নির্বাচনের বিষয়ে আন্দোলন করা রাজনৈতিক দলসমূহের সাথে কোন আলোচনা করে নি। উপরন্তু নির্বাচন কমিশন আওয়ামী লীগকে অন্যায়ভাবে ভোটে বিজয়ী করার জন্য সরকারের সাথে যৌথভাবে পরিকল্পনা করে মর্মে প্রতীয়মান হয়। একতরফাভাবে তৎকালীন আওয়ামী লীগকে বিজয়ী করার জন্যই বিরোধী দলসমূহ ও নির্বাচনের অংশীজনদের সাথে কোন সংলাপ আয়োজন করেনি। যার কারণে একতরফা নির্বাচন আয়োজনে নির্বাচন কমিশনও সরকারের সাথে জড়িত ছিল মর্মে প্রতীয়মান হয়। এ কাজে তৎকালীন নির্বাচন কমিশনার এম এ মোবারক এবং নির্বাচন কমিশন সচিবালয়ের অতিরিক্ত সচিব মোহাম্মদ সিরাজুল ইসলাম মূল ভূমিকা পালন করেন।

^১ বাংলাদেশ নির্বাচন কমিশন (২০১৫)। পরিসংখ্যান প্রতিবেদন: ১০ম জাতীয় সংসদ নির্বাচন

^২ “Failed election” on 5 Jan 2014 | Prothom Alo; Retrived on November 3, 2025

^৩ HC ruling backs 153 MPs elected unopposed; Retrived on November 3, 2025

এ ছাড়াও ৫ জানুয়ারি ২০১৪ তারিখে অনুষ্ঠিত নির্বাচনের পূর্বে প্রধান বিরোধী দল বিএনপিসহ অধিকাংশ রাজনৈতিক দলের নেতা-কর্মী এবং ভোটাধিকারের জন্য সংগ্রামে লিপ্ত সাধারণ ভোটারদের বিরুদ্ধে ব্যবস্থা নিতে সরকারের গোয়েন্দা সংস্থার বেআইনি তৎপরতার বিষয়টি নথি পর্যালোচনায় পাওয়া যায়। সরকারের গোয়েন্দা সংস্থার প্রতিবেদন এবং নির্বাচন কমিশনের নির্দেশে পুলিশ ব্যাপকহারে বিএনপি-জামায়াতসহ ভোটাধিকারের জন্য লড়াইরত অধিকাংশ রাজনৈতিক দলের নেতা কর্মীদের উপর মামলা, হামলা, হত্যা ও নির্যাতন শুরু করে। গোয়েন্দা সংস্থার এক প্রতিবেদনেই মাত্র ১ সপ্তাহে আইন-শৃঙ্খলা রক্ষাকারী বাহিনী কর্তৃক ৮৫জন বিরোধী দলীয় নেতা-কর্মীকে হত্যার তথ্য পাওয়া যায়। গোয়েন্দা সংস্থার তালিকা অনুযায়ী সারা দেশে বিরোধী দলীয় নেতা-কর্মী ও সাধারণ জনগণকে গ্রেফতার ও নির্যাতন করা হয়। ২০১৩ সালের ২৫ নভেম্বর তপশিল ঘোষণার পর থেকে ভোটের আগের দিন পর্যন্ত ১২৩ জন নিহত হয় মর্মে বিভিন্ন সংবাদ মাধ্যমে প্রকাশিত হয়।

২০১৪ সালের এ নির্বাচন কিভাবে বিনা ভোটের নির্বাচনে পরিণত হয় সে বিষয়ে জাতীয় নির্বাচন তদন্ত কমিশন অধিকতর তদন্ত ও অনুসন্ধান করেছে। এ অনুসন্ধানে দেখা যায়, ২০১৪ সালে যে ১৫৩টি আসনে প্রার্থীগণ বিনা প্রতিদ্বন্দ্বিতায় নির্বাচিত হয়েছিলেন সেসব আসনে প্রাথমিকভাবে মোট ৪৬০ জন প্রার্থী মনোনয়নপত্র জমা দিয়েছিলেন। এর মধ্যে মাত্র ৫টি আসনে ১ জন করে প্রার্থী মনোনয়নপত্র জমা দিয়েছিলেন। অবশিষ্ট ১৪৮টি আসন থেকে নির্বাচন কমিশন ১২৭ জনের প্রার্থিতা বাতিল করে। অধিকন্তু, ১৮০ জন বৈধ প্রার্থী তাদের প্রার্থিতা প্রত্যাহার করেন। প্রার্থিতা বাতিল ও প্রত্যাহারের ফলে শেষ পর্যন্ত ১৫৩টি আসনেই একক প্রার্থী থাকায় তাদেরকে বিনা প্রতিদ্বন্দ্বিতায় নির্বাচিত ঘোষণা করা হয়।

জাতীয় নির্বাচন তদন্ত কমিশন ১৫৩ আসনের মধ্য থেকে দৈব চয়নের মাধ্যমে ৬টি আসন নিয়ে কেইস স্টাডি করেছে। আসনগুলো হলো: ১৯ রংপুর-১, ১৭০ মানিকগঞ্জ-৩, ১৮৬ ঢাকা-১৩, ২৩৭ মৌলভীবাজার-৪, ২৮২ চট্টগ্রাম-৫, এবং ২৯৬ কক্সবাজার-৩। সারণি ৬.১ এ আসনগুলোতে মনোনয়নপত্র দাখিলকারীর সংখ্যা, বাতিলকৃত প্রার্থীর সংখ্যা, প্রত্যাহারকৃত প্রার্থীর সংখ্যা এবং বিনা প্রতিদ্বন্দ্বিতায় নির্বাচিত ব্যক্তির নাম ও দলীয় পরিচয় উল্লেখ করা হয়েছে।

সারণি ৬.১: ২০১৪ সালে ৬টি আসনে বিনা প্রতিদ্বন্দ্বিতায় নির্বাচনের চিত্র

আসন	মনোনয়নপত্র দাখিলকারীর সংখ্যা	বাতিলকৃত প্রার্থীর সংখ্যা	প্রত্যাহারকৃত প্রার্থীর সংখ্যা	বিনা প্রতিদ্বন্দ্বিতায় নির্বাচিত ব্যক্তি
১৯ রংপুর-১	৫	২	২	মোঃ মসিউর রহমান রাঙা (জাতীয় পার্টি)
১৭০ মানিকগঞ্জ-৩	৩	০	২	জাহিদ মালেক (বাংলাদেশ আওয়ামী লীগ)
১৮৬ ঢাকা-১৩	৩	০	২	জাহাঙ্গীর কবির নানক (বাংলাদেশ আওয়ামী লীগ)
২৩৭ মৌলভীবাজার-৪	৫	১	৩	সৈয়দ মহসিন আলী (বাংলাদেশ আওয়ামী লীগ)
২৮২ চট্টগ্রাম-৫	৫	১	৩	আনিসুল ইসলাম মাহমুদ (জাতীয় পার্টি)
২৯৬ কক্সবাজার-৩	১০	৬	৩	সাইমুম সরওয়ার কমল (বাংলাদেশ আওয়ামী লীগ)

কিন্তু উক্ত আসনগুলোতে এ নির্বাচনে যারা প্রার্থী ছিলেন তাদের অনেকেই মৃত্যুবরণ করেছেন। আবার অনেকেই পলাতক। ফলে তাদের সকলের বক্তব্য নেবার সুযোগ না থাকায় তদন্ত কমিশন স্থানীয় রাজনৈতিক নেতৃত্ব, নির্বাচন কমিশনের সংশ্লিষ্ট কর্মকর্তা, প্রার্থীর ঘনিষ্ঠজন ও পরিবারের সদস্যদের সাথে আলোচনা করে জানতে পেরেছে, প্রার্থিতা প্রত্যাহার করা বেশিরভাগ প্রার্থী বিভিন্ন উৎস থেকে হুমকি ও চাপের কারণে তাদের প্রার্থিতা প্রত্যাহার করেছিলেন। এ চাপ ও হুমকি প্রধানত বিভিন্ন গোয়েন্দা সংস্থার পরিচয়ে টেলিফোনে দেওয়া হয়েছিল। কোন কোন ক্ষেত্রে ক্ষমতাসীন দলের প্রার্থী ও তার সমর্থকেরা তাদেরকে হুমকি ও চাপ দিয়ে প্রার্থিতা প্রত্যাহার করতে বাধ্য করেছিলেন। এছাড়া কিছু ক্ষেত্রে স্থানীয় প্রশাসন - বিশেষ করে পুলিশকে এ কাজে ব্যবহার করা হয়েছিল। আবার কোন কোন ক্ষেত্রে প্রার্থীকে অর্থ দিয়ে প্রার্থিতা প্রত্যাহার করানো হয়েছিল। ঐ সময়ে সংশ্লিষ্ট শাখায় কর্মরত নির্বাচন কমিশন সচিবালয়ের কর্মকর্তারা জানান, কমিশনের সচিব এবং অতিরিক্ত সচিব বিভিন্ন আসনে সরকার দলীয় প্রার্থীদেরকে বিনা প্রতিদ্বন্দ্বিতায় জয়ী করাতে নানাভাবে প্রচেষ্টা ছিলেন। এর মধ্যে ছিল: (১) রিটার্নিং অফিসারদেরকে টেলিফোন করে জানতে চাওয়া ‘অন্য প্রার্থীরা কি প্রত্যাহার করেছে?’ ‘এখনও প্রত্যাহার করাতে পারেন নাই কেন?’ ‘তাড়াতাড়ি প্রত্যাহার করানোর ব্যবস্থা করেন’ ইত্যাদি। (২) এ নির্বাচনে প্রার্থিতা প্রত্যাহারের শেষ দিন ছিল ১৩ ডিসেম্বর ২০১৩। কিন্তু উপরোক্ত প্রচেষ্টা সকল আসনের ক্ষেত্রে যথাসময়ে সম্পন্ন করতে না পারায় কমিশন অবৈধভাবে ১৫ ডিসেম্বর পর্যন্ত নথ্যপত্রাদি দিয়ে প্রার্থিতা প্রত্যাহারের আবেদন দুই (২) দিন পর্যন্ত গ্রহণ করে। সময়ের অভাবে প্রকৃত তথ্য উৎখাত করা না গেলেও তদন্ত কমিশনের কাছে প্রতীয়মান যে, তৎকালীন ক্ষমতাসীন রাজনৈতিক দল অর্থাৎ আওয়ামী লীগ ১৫১টি আসনে তাদের ‘বিজয়’ নিশ্চিত করতে বিনা প্রতিদ্বন্দ্বিতায় নির্বাচনের আইনী বিধানের অপব্যবহার করেছিল।

কয়েকটি আসনে বিনা প্রতিদ্বন্দ্বিতায় নির্বাচন অনুষ্ঠানের আদ্যোপাত্ত

১৮৬ ঢাকা-১৩ আসন: ঢাকা-১৩ আসনে তিনজন প্রার্থী মনোনয়নপত্র জমা দিয়েছিলেন: জাহাঙ্গীর কবির নানক (আওয়ামী লীগ), মোঃ সফিকুল ইসলাম (জাতীয় পার্টি) এবং নাদের চৌধুরী (জাসদ)। রিটার্নিং অফিসার তিনজনের মনোনয়নপত্রই বৈধ ঘোষণা করেন। জাহাঙ্গীর কবির নানক পলাতক। তদন্ত কমিশন সফিকুল ইসলাম এবং নাদের চৌধুরীতে গুণানিতে হাজির হতে বলে। নাদের চৌধুরী গুণানিতে আসতে অপারগতা প্রকাশ করেন। কিন্তু এ আসনের রাজনৈতিক দলের নেতা-কর্মীদের ভাষ্যমতে নাদের সরকার দলীয় প্রার্থীর সাথে আপস করে তার প্রার্থিতা প্রত্যাহার করেছিলেন। অন্যদিকে মোঃ সফিকুল ইসলাম হাসপাতালে চিকিৎসাধীন থাকায় উপস্থিত হতে পারেননি। কিন্তু তিনি ০২/১১/২০২৫ তারিখে কমিশনে লিখিতভাবে জানান, ‘তখনকার রাজনৈতিক পরিস্থিতি, নির্বাচনের পরিবেশ এবং আত্মীয় স্বজনদের অনুরোধের পরিপ্রেক্ষিতে মনোনয়নপত্র প্রত্যাহার করতে বাধ্য হয়েছিলেন’। কিন্তু তার পত্রবাহক কমিশনকে জানান, সফিকুল ‘বিভিন্ন চাপের কারণে’ মনোনয়নপত্র প্রত্যাহার করতে বাধ্য হয়েছিলেন। দুইজন প্রার্থী মনোনয়নপত্র প্রত্যাহার করায় জাহাঙ্গীর কবির নানক বিনা প্রতিদ্বন্দ্বিতায় নির্বাচিত হয়েছিলেন।

১৭০ মানিকগঞ্জ-৩ আসন: মানিকগঞ্জ-৩ আসনে ৩ জন প্রার্থী মনোনয়নপত্র দাখিল করেন। মনোনয়নপত্র দাখিলকারীগণ ছিলেন: জাহিদ মালেক (বাংলাদেশ আওয়ামী লীগ), ইকবাল হোসেন খান (জাতীয় সমাজতান্ত্রিক দল-জাসদ), এম হাবীব উল্লাহ (জাতীয় পার্টি)। দাখিলকৃত ৩ জন প্রার্থীর মনোনয়নপত্র বাছাইকালে বৈধ ঘোষণা করা হয়। পরবর্তীতে রাজনৈতিক সমঝোতা এবং বিভিন্ন গোয়েন্দা সংস্থার তৎপরতায় ইকবাল হোসেন খান (জাতীয় সমাজতান্ত্রিক দল-জাসদ) এবং এম হাবীব উল্লাহ (জাতীয় পার্টি) মনোনয়নপত্র প্রত্যাহার করেন। ৩ জন প্রার্থীর মধ্যে ২ জন প্রার্থিতা প্রত্যাহার করায় আওয়ামী লীগের জাহিদ মালেককে রিটার্নিং অফিসার বিনা প্রতিদ্বন্দ্বিতায় বিজয়ী ঘোষণা করেন।

২৩৭ মৌলভীবাজার-৩ আসন: ২০১৪ সালে অনুষ্ঠিত দশম জাতীয় সংসদ নির্বাচনে মৌলভীবাজার-৩ আসনে ৫ জন প্রার্থী মনোনয়নপত্র দাখিল করেন। মনোনয়নপত্র দাখিলকারীগণ হলেন: সৈয়দ মহসিন আলী (বাংলাদেশ আওয়ামী লীগ), সৈয়দ সাহাব উদ্দিন আহমদ (জাতীয় পার্টি), সোহেল আহমেদ (স্বতন্ত্র), আব্দুল মোসাব্বির (জাতীয় সমাজতান্ত্রিক দল-জাসদ), মোঃ কামাল হোসেন (স্বতন্ত্র)। ৫ জন প্রার্থী মনোনয়নপত্র দাখিলকারীর মধ্যে বাছাইকালে ১ জন প্রার্থীর মনোনয়নপত্র বাতিল এবং অপর ৪ জন প্রার্থীর মনোনয়নপত্র বৈধ ঘোষণা করা হয়। কোন প্রার্থীর মনোনয়নপত্র বাতিল করা হয়েছিল তা তৎকালীন জেলা নির্বাচন অফিসারের মনে নাই। বৈধভাবে মনোনীত ৪ জন প্রার্থীর মধ্যে ৩ জন প্রার্থী রাজনৈতিক সমঝোতা এবং বিভিন্ন গোয়েন্দা সংস্থার তৎপরতায় মনোনয়নপত্র প্রত্যাহার করেন। উক্ত আসনে বাংলাদেশ আওয়ামী লীগের সৈয়দ মহসিন আলীকে একমাত্র প্রতিদ্বন্দ্বী প্রার্থী বিবেচনায় রিটার্নিং অফিসার বিনা প্রতিদ্বন্দ্বিতায় বিজয়ী ঘোষণা করেন।

২৮২ চট্টগ্রাম-৫ আসন: মোট ৫ জন মনোনয়নপত্র জমা দেন। এরা ছিলেন: আনিসুল ইসলাম মাহমুদ (জাতীয় পার্টি), ইউনুস গনি চৌধুরী (আওয়ামী লীগ), এডভোকেট মোঃ রফিকুল আলম (স্বতন্ত্র), মোঃ গিয়াস উদ্দীন (বাংলাদেশ ইসলামী ফ্রন্ট), এবং মোহাম্মদ নাসির হায়দার করিম (স্বতন্ত্র)। রিটার্নিং অফিসার বাছাইকালে স্বতন্ত্র দুই প্রার্থীর আবেদনের সাথে জমা দেওয়া ১% ভোটারের অনেকের তথ্য ও স্বাক্ষর সঠিক নয় বলে উল্লেখ করে তাদের প্রার্থিতা বাতিল করে দেন। উক্ত দুই প্রার্থী বারবার উক্ত ১% ভোটারের তথ্য সঠিক দাবি করে উক্ত ১% ভোটারকে হাজির করার প্রস্তাব দিলেও রিটার্নিং অফিসার তার সিদ্ধান্ত বহাল রাখেন এবং উক্ত অফিসার অন্য কর্মকর্তারা এটি নিয়ে ‘আপিল করলেও কোন লাভ হবে না’ বলে জানিয়ে দেন। এখানে উল্লেখ্য যে, প্রার্থিতা বাছাইয়ের দিন সকাল থেকেই উক্ত স্বতন্ত্র প্রার্থীদের বেশ কয়েকটি অজ্ঞাত মোবাইল ফোন নম্বর থেকে বিভিন্ন বাহিনী/সংস্থার পরিচয় দিয়ে ফোন করে প্রার্থিতা প্রত্যাহার করতে বলা হয়। ইউনুস গনি চৌধুরী (আওয়ামী লীগ) এবং মোঃ গিয়াস উদ্দীন (বাংলাদেশ ইসলামী ফ্রন্ট) এর সাথে রাজনৈতিক সমঝোতা করে তাদেরকে বসিয়ে দেওয়া হয়। ফলে আনিসুল ইসলাম মাহমুদ বিনা প্রতিদ্বন্দ্বিতায় বিজয়ী হন।

অন্যদিকে যেসব আসন ঐ অপকৌশলের অন্তর্ভুক্ত ছিল না সেগুলোতে ‘অংশগ্রহণমূলক’ নির্বাচনের সকল প্রচেষ্টা ছিল। এর অংশ হিসেবে জাতীয় পার্টিকে টার্গেট করা হয়। এ নির্বাচনে মনোনয়নপত্র দাখিলের শেষ তারিখ ছিল ২ ডিসেম্বর ২০২৩ (সোমবার) এবং প্রার্থিতা প্রত্যাহারের শেষ দিন ছিল ১৩ ডিসেম্বর ২০২৩ (শুক্রবার)। জাতীয় পার্টির প্রার্থীরা শেষ তারিখে মনোনয়নপত্র দাখিল করার পরদিন অর্থাৎ ৩ ডিসেম্বর ২০১৩ (মঙ্গলবার) চেয়ারম্যান দলের প্রার্থীদের মনোনয়নপত্র প্রত্যাহারের নির্দেশ দেন^৪। এ নির্দেশ অনুযায়ী বেশিরভাগ প্রার্থী ১৩ ডিসেম্বর ২০২৩ (শুক্রবার) এর আগেই মনোনয়নপত্র প্রত্যাহারের আবেদন করলেও নির্বাচন কমিশন সে আবেদনগুলো আমলে নেয়নি। তদন্ত কমিশন চেষ্টা করেও ঐসব আবেদন নির্বাচন কমিশন থেকে উদ্ধার করতে পারে নি। কমিশনের কর্মকর্তাদের ভাষ্যমতে ঐসব আবেদন ধ্বংস করে ফেলা হয়েছে। নির্বাচন বর্জনের ঘোষণা দেওয়ায়

^৪ “Now Ershad backtracks from polls”. Dhaka Tribune. 3 December 2013. Retrieved 18 November 2025.

এরশাদের উপর খড়গ নেমে আসে। ৪ ডিসেম্বর রাতে নিরাপত্তা বাহিনী তার বাড়ি ঘেরাও করলে তিনি আত্মহত্যার হুমকি দেন^৫। ১৩ ডিসেম্বর নিরাপত্তা বাহিনী তাকে গ্রেফতার করে একটি সামরিক হাসপাতালে আটক রাখে, যদিও র্যাবের পক্ষ থেকে বলা হয় এরশাদকে তার নিজের অনুরোধেই নিয়ে যাওয়া হয়েছিল^৬।

তদন্তে প্রাপ্ত ফলাফল

-  বিনা প্রতিদ্বন্দ্বিতায় নির্বাচিত হওয়া ১৫৩টি আসনের মধ্যে ৫টি মাত্র আসনে ১ জন করে প্রার্থী ছিল। অবশিষ্ট ১৮৪টি আসনে প্রার্থীদেরকে হুমকি ও চাপ দিয়ে কিংবা মনোনয়নপত্রে ‘ত্রুটি’ বের করার মাধ্যমে একজন মাত্র প্রার্থীকে চূড়ান্তভাবে বৈধ ঘোষণা করে বিনা প্রতিদ্বন্দ্বিতায় নির্বাচিত ঘোষণা করা হয়।
-  সরকার গঠনের উদ্দেশ্যে বিনা প্রতিদ্বন্দ্বিতায় নির্বাচিত হওয়ার জন্য ১৫১টি আসনকে টার্গেট করা হয়।
-  অন্য ১৪৭টি আসনে ‘প্রতিযোগিতামূলক’ নির্বাচন অনুষ্ঠানের অপকৌশল হিসেবে জাতীয় পার্টির প্রার্থীদের প্রার্থিতা প্রত্যাহারের আবেদন আমলে না নিয়ে সেগুলো ধ্বংস করে ফেলা হয়।



^৫ "Ershad threatens suicide". *Gulf Times*. 5 December 2013. Retrieved 18 November 2025.

^৬ "Ershad led away from home". *Gulf Times*. 14 December 2013. Retrieved 18 November 2025.